

PARADA DI MUCHA MAS ANIMA Y ORDENA CU NUNCA

Casi 2000 mucha den parada

ORANJESTAD(AAN):

Tabata e hit musical di "Audius Philips cu OREO, Cake e Boem" cu a ser toca casi durante henter e parada di mucha ayera na Playa, cu por bisa cu e parada tabata esun mas anima di tur tempo como parada di mucha.

Motibo tras di esaki tabata

e show cu muchanan tabata duna riba caya y tur caminda anima pa e publico.

E parada aki a resulta tambe den esun mas ordena te awor, cu excepcion di algun sitio unda cu publico apesar di medida di polis y orden pa keda tras di barricada a kibra e orden aki. Pero pa casi totalidad di e

ruta e parada tabata masha ordena un deleite pa mira con e gruponan tabata biniendo cerca y pasa bo dilanti.

Un total di 1901 mucha a participa den e parada ayera, ya cu a bini varios grupo acerca y tambe tabata tin jeepnan cu a presenta cu varios reina, runnerupnan, y princesitanan di distrito, schoolnan y speelschoolnan.

Ban Goza a habri parada ayera cu reina infantil cu su 300 participantenan y su 17 roadpiecenan y mas mey mey tabata tin e grupo di Centro di bario Noord cu 500 participante mientras cu varios otro grupo di Noord a participa individual como grupo tambe.

Santa Cruz for Kids tabata un preciosidad cu su barionan y masha original tipico y riba esey un luho admirable. Savaneta tambe a presenta cu 125 Brazilian Dancers cu tabata den e gruponan bunita.

No por keda sin menciona e impacto cu Española Ole a haci cu su grupo luhoso y su 9 piesanan di caya.

Wonderful world of China di Kids in Action tambe tabata un di e gruponan cu

roadpiecenan y carosa luhoso y bunita.

Un total di 20 grupo a participa den parada cu un total di 84 roadpiece, 11 carosa, 12 Sound System of Disco, 6 brassband, y 10 agrupacion musical. Di e ultimonan aki por menciona Eclipse, Oreo, Quasi, Taxx, Grasshoppers, Dushi Band, TOS, Original Band, Los Duques, Caribbean Band cu a deleita e publico cu nan musica, un mas fuerte cu otro, pero cu tur dunando nan contribucion musical en grande.

Por menciona tambe cu tabata tin na trailer-bar, pickup bar, vehiculo di utilidad, jeep-bar, Van -bar y otro vehiculonan, un total di 33 den e parada pa asisti e gruponan.

Un remarca cu mester duna ta si cu casi tur e gruponan cu a participa ayera den parada na Playa, tabata gruponan di Noord y vecindario, Santa Cruz y vecindario, of di pariba di brug, y cu di parti di Playa y vecindario mes, for di unda ta ser spera por lo menos un 10 grupo, ta mira masha poco participacion. Por bisa cu di Playa ta Viva España Ole a saca cara di Oranjestad y vecindario.